

海豐吳氏石蓮盦彙刻九金人集

天籟集

第三六冊



白蘭谷天籟集序

明甯獻王權譜元人曲作者凡一百八十有七人白
仁父居第三雖次東籬小山之下而喻之鵬搏九霄
其矜許也至矣余少日避兵練浦村舍無書覽金元
院本最喜仁父秋夜梧桐雨劇以爲出關鄭之上及
輯唐宋元人詩餘爲詞綜憾未得仁父隻字意世無
復有儲藏者康熙庚辰八月之望六安楊希洛氏千
里造余囊中出蘭谷天籟集則仁父之詞也前有王
尚書子勉序述仁父門世本末頗詳始知仁父名朴
又字太素爲樞判寓齋之子後又有洪武中國子助
教江陰孫大雅序及安正儒學教諭松江曹安贊余
因攷元人詩集則匪獨遺山元氏與樞判矜契若秋
澗王氏雪樓程氏皆有與白氏父子往來贈送之詩
蓋寓齋子三人仁父仲氏也其伯叔則誠父敬父敬
父官江西理問雪樓送其之官有思君還讀寓齋詩
之句此亦敬父昆弟之父執矣白氏於明初由姑孰
徙六安是集希洛得之於其裔孫駒將刊行屬余正
其誤乃析爲二卷序其端竹垞老人朱彝尊

余以洪武甲寅春掾姑孰郡文學時真定白溟子南分教諸生閒示其祖蘭谷先生天籟集謹按先生諱朴字仁甫後改字太素姓白氏號蘭谷金季寓齋先生樞密院判之子也寓齋生三子先生其仲子也先生生長兵閒流離竄逐父子相失遂鞠於元遺山先生所遺山教之成人始歸其家先生少有志天下已而事乃大謬顧其先爲金世臣旣不欲高蹈遠引以抗其節又不欲使爵祿以污其身於是屈己降志玩世滑稽徙家金陵從諸遺老放情山水閒日以詩酒優游用示雅志以忘天下詩詞篇翰在在有之是編

天序

二

計詞二百餘首名天籟集兵燹散失其孫溟得之姑孰士大夫家傳寫失真字多謬誤余旣考訂一二歸之比召赴京復求語以敘之余惟先生詞章翰墨揮灑奮迅出於天才旣以得名當時板行於世余又何足以輕重哉然有不可以不一言者先生出處大節微而婉曲而肆庸人孺子所不能識非志和龜蒙林君復往而不返之儔可同日語故序以著其出處之大較云洪武丁巳春二月國學助教江陰孫大雅敘

樂府始於漢著於唐盛於宋大概以情致爲主秦晁
賀晏雖得其體然哇淫靡曼之聲勝東坡稼軒矯之
以雄詞英氣天下之趨向始明近時元遺山每遊戲
於此掇古詩之精英備諸家之體製而以林下風度
消融其膏粉之氣白樞判寓齋序云裕之法度最備
誠爲確論宜其獨步當代光前人而冠來者也元白
爲中州世契兩家子弟每舉長慶故事以詩文相往
來太素卽寓齋仲子於遺山爲通家姪甫七歲遭壬
辰之難寓齋以事遠適明年春京城變遺山遂挈以
北渡自是不茹葷血人問其故曰俟見吾親則如初

天序

三

嘗罹疫遺山晝夜抱持凡六日竟於臂上得汗而愈
蓋視親子弟不啻過之讀書穎悟異常兒日親炙遺
山警歎談笑悉能默記數年寓齋北歸以詩謝遺山
云顧我真成喪家狗賴君曾護落巢兒居無何父子
卜築於滹陽律賦爲專門之學而太素有能聲號後
進之翹楚者遺山每過之必問爲學次第常贈之詩
曰元白通家舊諸郎獨汝賢未幾生長見聞學問博
覽然自幼經喪亂蒼皇失母便有山川滿目之歎逮
亡國恆鬱鬱不樂以故放浪形骸期於適意中統初
開府史公將以所業力薦之於朝再三遜謝棲遲衡

門視榮利蔑如也太素與余三十年之舊時會於江東嘗與余言作詩不及唐人未可輕言詩平生留意於長短句散失之餘僅二百篇願吾子序之讀之數過辭語道麗情寄高遠音節協和輕重穩愜凡當歌對酒感事興懷皆自肺腑流出余因以天籟名之噫遺山之後樂府名家者何人殘膏賸馥化爲神奇亦於太素集中見之矣然則繼遺山者不屬太素而奚屬哉知音者覽其所作然後知余言之不爲過太素名朴舊字仁甫蘭谷其號云至元丁亥春二月上休日正議大夫行御史臺中丞西溪老人王博文子勉

天序

序

天籟集目錄

卷上

春從天上來

奪錦標 二首

水調歌頭 十六首

水龍吟 十首 曹光輔和韻一首附

念奴嬌 四首 僧仲璋一首附

滿江紅 五首

登瑞鶴仙

沁園春 八首

天目

風入松

卷下

風流子

燭影搖紅

摸魚子 五首

木蘭花慢 十二首

玉漏遲 三首

江梅引

秋色橫空 二首

石州慢

鳳凰臺上憶吹簫

滿庭芳

綠頭鴨

永遇樂

賀新郎

謙瑤池

垂楊

西江月

六首

浪淘沙

三首

朝中措

五首

天目

清平樂

六首

李仁山次韻一首附

點絳脣

小桃紅

鬪莎行

浣溪沙

天籟集目錄

天籟集卷上

元真定白朴太素

春從天上來

至元四年恭遇聖節真定總府請作壽詞

樞電光旋應九五飛龍大造登乾萬國冠帶一氣陶甄
天眷自古雄燕喜光臨彌月香浮動太液秋蓮鳳樓
前看金盤承露玉鼎霏煙梨園太平妙選贊虎拜猊
觴鷺序鸞聯九奏虞韶三呼嵩嶽何用海上求仙但
巖廊高拱瓜瓞衍皇祚縣縣萬斯年快康衢擊壤同戴堯天

天上

奪錦標

奪錦標曲不知始自何時世所傳者惟僧仲殊一篇而已子每浩歌尋繹音節因欲效顰恨未得佳趣耳庚辰卜居建康暇日訪古采陳後主張貴妃事以成素志按後主旣脫景陽井之厄隋元帥府長史高頴竟就戮麗華於青溪後人哀之其地立小祠祠中塑二女郎次則孔貴嬪也今遺構荒涼廟貌亦不存矣感歎之餘作樂府青溪怨

霜水明秋霞天送晚畫出江南江北滿目山圍故國

三閣餘香六朝陳迹有庭花遺譜慘哀音令人嗟惜
想當時天子無愁自古佳人難得惆悵龍沈宮井
石上啼痕猶點胭脂紅溼去去天荒地老流水無情
落花狼籍恨青溪猶在渺重城煙波空碧對西風誰
與招魂夢裏行雲消息

得友人王仲常李文蔚書

仲常名思廉仕元至翰林學士承旨

孤影長嗟憑高眺遠落日新亭西北幸有山河在眼
風景留人楚囚何泣儘紛爭蝸角算都輸林泉閒適
澹悠悠流水行雲任我平生踪跡誰念江州司馬
淪落天涯青衫未免沾溼夢裏封龍舊隱經卷琴囊
酒尊詩筆對中天涼月且高歌徘徊今夕隴頭人應
也相思萬里梅花消息

水調歌頭

詠月

銀蟾吸清露白兔搗玄霜青天萬古明月中有物蒼
蒼想是臨風丹桂費盡斫雲玉斧秋蕊自芬芳印透
一輪影吹下九天香怪霜娥才二八減容光蛾眉
幾畫新樣晚鏡爲誰妝見說開元天子曾到清虛仙
府一曲聽霓裳何事便歸去空斷舞鸞腸

用前韻

明月復明月天宇淨新霜霜中養就白兔未覺玉容
蒼照影來今往古圓缺陰晴幾度丹桂儼然芳遐想
廣寒露誰得一枝香恍瑤臺飛寶鏡散重光嫦娥
久餌靈藥點出淡雲妝閒與風姨相聚不似天孫獨
苦終日織仙裳脈脈望河鼓縈損幾柔腸
韻

蒼煙擁喬木粉雉倚寒空行人日暮回首指點舊離
宮好在龍蟠虎踞試問石城鍾阜形勢爲誰雄慷慨
一尊酒南北幾衰翁賦朝雲歌夜月醉春風新亭

天上

三

何苦流涕興廢古今同朱雀橋邊野草白鷺洲邊江
水遺恨幾時終喚起六朝夢山色有無中

諸公見賡前韻復自和數章戲呈施雪谷景

悅

樓船萬艘下鍾阜一龍空胭脂石井猶在移出景陽
宮花草吳時幽徑禾黍陳家古殿無復成樓雄更道
子山賦愁殺白頭翁記當年南北恨馬牛風降旛
一片飛出難與向來同璧月瓊枝新恨結綺臨春好
夢畢竟有時終莫唱後庭曲聲在淚痕中

感南唐故宮就櫟括後主詞

南郊舊壇在北渡昔人空殘陽澹澹無語零落故王
宮前日雕闌玉砌今日遺臺老樹尙想霸圖英雄誰謂
埋金地都屬賣柴翁 慨悲歌懷故國又東風不堪
往事多少回首夢魂同借問春花秋月幾換朱顏綠
鬢荏苒歲華終莫上小樓上愁滿月明中

又

朝花幾回謝春草幾回空人生何苦奔競勒破大槐
宮不入麒麟畫裏卻喜鱸魚江上一宅了楊雄且飲
建業水莫羨富家翁 翫青山歌赤壁想高風兩翁
今在何許喚起一尊同繫住天邊白日抱得山閒明

天上

四

月我亦遂長終何必翳鸞鳳游戲太虛中

咸陽懷古復用前韻

鞭石下滄海海內漸成空君王日夜爲樂高枕望夷
宮方歎東門逐兔又慨中原失鹿草昧起英雄不待
素靈哭已識斬蛇翁 笑重瞳徒叱咤凜生風阿房
三月焦土有罪與秦同秦固亡人六國楚復絕秦三
世萬世界誰終我欲問天道政在不言中

擬遊茅山贈心遠提點

三峰足雲氣萬壑散秋聲茅君曾此成道山與地俱
靈遙望蒼松紫檜疑是煙幢霧蓋冉冉下青冥鸞鶴

故山夢香火歲時情 洞天開丹竈冷有遺經華陽
自古招隱飛煉得長生慙媿山中宰相便許綸巾鶴
擎相對聽吹笙何處滄浪水吾亦濯塵纓

冬至同行臺王子勉中丞韓君美侍御霍清
夫治書登周處讀書臺過古鹿苑寺

疏雲黯霧樹秋潦淨寒潭徘徊子隱臺下不見舊書
龕鹿苑空餘蕭寺蟒穴誰傳邨氏聊此問瞿曇千古
得欺罔一笑莫窮探 俯秦淮山倒影浴層嵐六朝
城郭如故江北到江南三十六陂春水二十四橋明
月好景入清談未醉更呼酒欲去且停驂

天上

五

丙戌夏四月八日夜夢有人以三元祕秋水
五言謂予請三元之義曰上中下也恍惚玩
味可作水調歌頭首句恨祕字之義未詳後
從相國史公歡遊如平生俾賦樂章因道此
句但不知祕字何意公曰祕卽封也甫一韻
而寤後三日成之以識其異

三元祕秋水□□□□□□□□□□天人點破消息夢裏悟南
華河伯徒□□□□□□□□歸毫末一笑井中蛙試問
漆園老誰是大方家 □黃鐘推甲子定無差悠悠
天理人事風外萬飛沙且弄空山明月自薦寒泉秋

菊睡起漱朝霞更欲辨齊物銀海眩生花

予既賦前篇一日舉似京口郭義山義山曰
此詞固佳但詳夢中所得之句元者應謂水
府今止詠甲子及秋水篇事恐未盡也因請
再賦

三元祕秋水秋水一何多江流滾滾無盡淮漢入包
羅遙想靈官神府坐閱潮頭風怒萬里瞰滄波浩蕩
沒鷗鷺噴薄出蛟鼉馬當山牛渚渡幾人過金鰲
下瞰京口舟楫避盤渦始信林生禱雨一濯黃泥盡
許無奈旱苗何我欲洗兵馬誰解挽天河

天上

六

予兒時在還山家阿姊嘗教誦先叔放言古
今忽白首感念之餘賦此詞云

韓非死孤憤虞叟坐窮愁懷沙千古遺恨郊島兩詩
囚堪笑井蛙禪蝨不道人生能幾肝肺自相讎政有
一朝樂不抵百年憂歎悠悠江上水自東流紅顏
不暇一惜白髮忽盈頭我欲拂衣遠引直上崧山絕
頂把酒勸浮丘藉此兩黃鵠浩蕩看齊州

又

北風下庭綠客鬢入霜華回首北望鄉國雙淚落清
笳天地悠悠逆旅歲月悠悠過客吾也豈匏瓜四海

有知己何地不爲家
五溪魚千里菜九江茶從他
造物留住辦作老生涯不願酒中有聖但願心頭無
事高枕臥煙霞晚節憶吹帽籬菊漸開花

至元戊寅爲江西呂道山參政壽

香風萬家曉和氣九江春朝回冠蓋得意玉季和金
昆屈指登高舊節側耳稱觴新語采菊舊芳尊南土
愛王粲東閣壽平津節龍香符虎重印龜新弓刀
千騎如水曾爲下南閩牆外陰陰桃李庭下輝輝蘭
玉一笑指莊椿更看濟時了高臥道山雲

十月海棠

天上

七

金盤薦華屋銀燭照紅妝歡遊會得多少風雨送春
忙只道神仙漸遠爭信情緣未斷自有返魂香萬木
盡搖落穠豔又芬芳憶真妃春睡足按霓裳馬嵬
西下回首野日淡無光不避山茶小雪似愛江梅新
月疏影伴昏黃誰喚阿嬌起呵手染湘霜

細與脰同是卮渠集
子可詞自注請脂粉也

夜醉西樓爲楚英作

雙眸翦秋水十指露春蔥仙姿不受塵污縹緲玉芙蓉
舞徧柘枝遺譜歌盡桃花團扇無語到東風此意
復誰解我輩正情鍾喜相從詩卷裏酒杯中纏頭
安用百萬自有海犀通日日東山高興夜夜西樓好

夢斜月小簾櫳何物寫幽思醉墨錦箋紅

水龍吟

丙午秋到維揚途中值雨甚快然

短亭休唱陽關柳絲惹盡行人怨鴛鴦隻影荷枯葦
淡沙寒水淺紅綬雙銜玉簪中斷苦難留戀更黃花
細雨征鞍催上青衫淚一時濺回首孤城不見黯
秋空去鴻一綫情緣未了誰教重賦春風人面鬪草
閒庭采香幽徑舊曾行徧謾今宵酒醒無言有恨恨
天涯遠

么前三字用仄者見田不伐洋嘔集水龍吟

天上

八

二首皆如此田妙於音蓋仄無疑或用平字
恐不堪協雲和署樂工宋奴伯婦王氏以洞
簫合曲宛然有承平之意乞詞於予故作以
贈會好事者爲王氏寫真末章及之

綠雲簫史臺空洞天誰是驂鸞伴傷心記得開元遊
幸連昌別館力士傳呼念奴供唱阿郎吹筦悵無情
一枕繁華夢覺流年又暗中換 邂逅京都兒女歡
遊徧畫樓東畔尊前一曲餘音嫋嫋驪珠相貫日落
邯鄲月明燕市儘堪腸斷倩丹青細染風流圖畫寫
崔徽半

送史總帥鎮西川時方混一
壯懷千載風雲玉龍無計三冬臥天教喚起崢嶸才
器人稱王佐豹略深藏虎符榮佩君恩重荷看旌旗
動色軍容一變鵬翼展先聲播我望金陵王氣儘
消磨區區江左樓船萬艣瞿塘東瞰徒橫鐵鎖八陣
名成七禽功就南夷膽破待他年畫像麒麟閣上爲
將軍賀

九月四日爲江州總管楊文卿壽

鴈門天下英雄策勳宜在平吳後金符佩虎青雲飄
蓋名藩坐守千里江皋一時淮甸埽清殘寇看人歸

天上

九

厚德天垂餘慶階庭畔芝蘭秀我望戟門如畫氣
佳哉危亭新構年年此席風流長占中秋重九丹桂
留香綠橙供味碧萸催酒有廬山絕頂蒼蒼五老贊
君侯壽

登岳陽樓感鄭生龍女事譜大曲薄媚

洞庭春水如天岳陽樓上誰開宴飄零鄭子危闌倚
徧山長恨遠何處蘭舟彩霞浮漾笙簫一片有蛾眉
起舞含嚔凝睇分明是舊仙媛風起魚龍浪卷望
行雲飄然不見人生幾許悲歡離聚情鍾難遣聞道
當時汜人能誦招魂九辯又何如乞我輕綃數尺寫

湘中怨

九日同諸公會飲鍾山望草堂有感

倚天鍾阜龍蟠四時青壁雲煙潤陂陀十里蒼髯夾
路清風緩引蘭若西邊草堂別掩遺基猶認自猿驚
鶴怨山人去後誰更向此中隱 獨愛丹崖碧嶺枕
平川人家相近登臨對酒茱萸香細莓苔坐穩老計
菟裘故應來就林泉佳處怕煙霞笑我塵容俗狀把
山英問

送張大經御史就用公九日韻兼簡盧處道

副使使甯國買按察司時

盧號疎齋

天上

十

繡衣攬轡西行慨然有志人知否江山好處留連光
景一杯別酒世事無端惱人方寸十常八九對霜松
露菊荒寒三徑等閒又登高後 問訊宣城太守幾
裁詩畫堂清畫山長水闊思君不見踟躕搔首卻羨
行雲暫留還去無心出岫笑窮途歲晚江頭送客唱
青青柳

遺山先生有醉鄉一詞僕飲量素慳不知其

趣獨閒居嗜睡有味因爲賦此

醉鄉千古人行看來直到亡何地如何物外華胥境
界昇平夢寐鸞馭翩翩蝶翅栩栩俯觀羣蟻恨周公

不見莊生一去誰真解黑甜味 聞道希夷高臥占
三峰華山重翠尋常羨殺清風嶺上白雲堆裏不負
平生算來惟有日高春睡有林閒剝啄忘機幽鳥喚
先生起

曹光輔教授凡和三十首不能盡錄姑記其

一云

世閒清苦禪和了心才到安閒地藜牀兀兀經年
打坐頽然假寐卻甚牀邊偶聞牛鬪不知喧蟻怪
藤條臨濟飢餐困臥方會得箇中味 爭似橫江
樓上入簾櫳好山供翠悠悠萬事從今都付黃梁

天上

七

炊裏朝暮陰晴定應不廢平生甘睡笑痴人問我
何當夢覺爲蒼生起

用前韻贈答光輔

倚闌千里風煙下臨吳楚知無地有人高枕樓居長
夏晝眠夕寐驚覺游仙紫毫吐鳳玉觴吞蟻更誰人
似得淵明太白詩中趣酒中味 慙媿東溪處士待
他年好山分翠人生何苦紅塵陌上白頭浪裏四壁
窗明兩盂粥罷暫時打睡儘聞雞祖述中宵狂舞蹴
劉琨起

予始賦睡詞諸公賡和三十餘首一日友人

王文卿攜餽來訪話及梁園舊遊因感其事
復用前韻

萬金不買青春老來可惜歡娛地有時記得江樓深
夜解鞍留寐蘭燄噴虹寶香薰麝玉醅芻蟻更誰能
細說當年風韻江瑤柱荔枝味 漂泊江湖萬里渺
難尋采菱拾翠何心更到折枝圖上賣花聲裏蓬鬢
刁騷角巾敲墮枕書聊睡恨怱怱未辨蓴鱸歸棹又
秋風起

念奴嬌

題鎮江多景樓用坡仙韻

天上

三

江山信美快平生一覽南州風物落日金焦浮紺宇
鐵甕猶殘城壁雲擁潮來水隨天去幾點沙鷗雪消
磨不盡古今天寶人傑 遙望石豕嶮然參軍此葬
萬劫誰能發桑梓龍荒驚歎後幾度生靈埋滅往事
休論酒杯纔近照見星星髮一聲長嘯海門飛上明
月

中秋效李敬齋體每句用月字

一輪月好正人間八月涼生襟裊萬古山河歸月影
表裏月明光透月桂婆娑月香飄蕩修月香人手深
沈月殿月娥誰念消瘦 今夕乘月登樓天低月近

對月能無酒把酒長歌邀月飲明月正堪爲友月向
人圓月和人醉月是承平舊年年賞月願人如月長
久

中秋重九人閒佳節也古今賦詠固多予早
年嘗記僧仲璋九日述懷一篇與此篇幅相

同恐歲久無傳就附於此

仲璋俗姓閩法諱志埏號山泉道人

落魄嗜酒滑稽玩世頗爲時人所愛

消磨九日算年年惟有黃花白酒把酒簪花能有
幾七十光陰回首人壽難期酒杯有限花色應如
舊花穠酒醞問君著甚消受彭澤千古英魂有

天上

三

花能折有酒能傾否萬事悠悠輸一醉花酒休教
離手明月西風闌珊酒盡憔悴花枝瘦酒腸花眼
正宜年少時候

題闕

江湖落魄鬢成絲遙憶揚州風物十里樓臺簾半卷
玉女香車鈿壁后土祠寒唐昌花盡誰弄瓊枝雪山
川良是古來銷盡雄傑落日煙水茫茫孤城殘角
怨入清笳發岸檣扁舟人不寐柳外漁燈明滅半夜
潮來一帆風送凜凜森毛髮乘流東下玉簫吹落殘

月

壬戌秋泊漢江鴛鴦灘寄贈

露團漸冷又今年孤負中秋明月誰念江干憔悴我
夢斷芙蓉城闕燕子東歸鴻賓南下滿眼蘆花雪行
人何處也應珠淚凝睫常記樓上歌聲一尊酒盡
默默無言別恨殺鴛鴦灘下水不寄題詩紅葉聚淚
鮫綃畫眉螺黛總在歸時節百年心事等閒休向人
說

滿江紅

題呂仙祠飛吟亭壁用馮經歷韻

雲外孤亭空悵望煙霞仙客還試問飛吟詩句爲誰

天上

古

留別三入岳陽人不識浮生擾擾蒼蠅血道老精知
向樹陰中曾來歇松檉在虬枝結皮溜雨根盤月
恨還丹不到後來豪傑塵世千年翻甲子秋空一劍
橫霜雪待他時攜酒赤城遊相逢說

用前韻留別巴陵諸公

時至元十四年冬

行徧江南算只有青山留客親友閒中年哀樂幾回
離別碁罷不知人換世兵餘猶見川留血歎昔時歌
舞岳陽樓繁華歇寒日短愁雲結幽故壘空殘月
聽閭閻談笑果誰雄傑破枕纔移孤館雨扁舟又泛
長江雪要煙花三月到揚州逢人說

庚戌春別燕城

雲鬢犀梳誰似得錢塘人物還又喜小窗虛幌伴人
幽獨薦枕恰疑巫峽夢舉杯忽聽陽關曲問淚痕幾
度浥羅巾長相續南浦遠歸心促春草碧春波綠
黯銷魂無際後歡難卜試手窗前機織錦斷腸石上
簪磨玉恨馬頭斜月減清光何時復

重陽後二日王彥文並利用秦山甫相過小

文選

飲利用亦姓王字國賓贈
杜國中書平章政事

過了重陽寒慘慘秋陰連日尙何事滿城風雨漏天
如泣點染一林紅葉暗飄蕭三徑黃花溼聽敲門忽

天上

五

有客三人來相覓時節好誇橙橘兒女喜分梨栗
罄一尊聊慰老懷岑寂想像曾來神女賦傷心似失
文通筆破殘年催釀酒如川長鯨吸

同鄭都事復用前韻退訖所租學田

費盡長繩繫不住西飛白日客窗外滿庭秋草露蛩
寒泣酒後看花空眼亂花前把酒從衣溼要一塵歸
老作菟裘何難覓仙客老巴園橘封萬戶燕山栗
且栽培松竹伴人孤寂豈有梁鴻高世志也無司馬
題橋筆便與君同訪洞庭春和雲吸

登金陵烏衣園來燕臺

夕陽王謝宅對草樹荒寒亭臺敬側烏衣舊時客渺
雙飛萬里水雲寬窄東風羽翅也迷卻當時巷陌向
尋常百姓人家孤負幾回春色音悽惻人空不見畫
棟棲香繡簾窺額雲兜霧隔錦書至付誰拆劉郎只
見慣金陵興廢贈得行人鬢白又爭如復到玄都免
葵燕麥

沁園春

金陵鳳凰臺眺望

獨上遺臺目斷清秋鳳兮不還悵吳宮幽徑埋深花

天上

去

草晉時高冢銷盡衣冠橫吹聲沈騎鯨人去月滿空
江鴈影寒登臨處且摩挲石刻徙倚闌干 青天半
落三山更白鷺洲橫二水閒問誰能心比秋來水靜
漸教身似嶺上雲閒擾擾人生紛紛世事就裏何常
不强顏重回首怕浮雲蔽日不見長安

保甯佛殿卽鳳凰臺太白留題在焉宋高

宗南渡嘗駐蹕寺中有石刻御書王荆公

贈僧詩云紛紛擾擾十年閒世事何常不

强顏亦欲心如秋水靜應須身似嶺雲閒

意者當時南北擾攘國家蕩析磨盾鞍馬

閒有經營之志百未一遂此詩若有深契
於心者以自況予暇日來遊因演太白荆
公詩意亦猶稼軒水龍吟用李延年清子

西真阿母髮語也

我望山形虎踞龍盤壯哉建康憶黃旗紫蓋中興東
晉雕闌玉砌下逮南唐步步金蓮朝朝瓊樹宮殿吳
時花草香今何日尚寺留蕭姓人做梅妝長江不
管興亡謾流盡英雄淚萬行問烏衣舊宅誰家作主
白頭老子今日還鄉弔古愁濃題詩人去寂寞高樓
無鳳凰斜陽外正漁舟唱晚一片鳴榔

天上

七

夜夢就樹摘桃噉之於中一枚甘苦覺而異
之因爲之賦

渺渺吟懷望佳人兮在天一方問鯤鵬九萬扶搖何
力蝸牛兩角蠻觸誰強華表鶴來銅盤人去白日青
天夢一場俄然覺正醯雞舞甕野馬飛窗 徜徉玩
世何妨更誰道狂時不得狂羨東方臣朔從容帝所
西真阿母喚作兒郎一笑人間三遊海上畢竟仙家
日月長相隨去想蟠桃熟後也許偷嘗

監察師巨源將辟子爲政因讀嵇康與山濤
書有契於予心者就譜此詞以謝

自古賢能壯哉飛騰老來退閒念一身九患天教寂
寞百年孤憤日就衰殘麋鹿難馴金鑣縱好志在長
林豐草閒唐虞世也曾聞巢許遁跡箕山越人無
用殷冠怕機事纏頭不耐煩對詩書滿架子孫可教
琴尊一室親舊相歡况屬清時得延殘喘魚鳥溪山
任往還還知否有絕交書在細與君看

送按察司合道公赴浙東任

玉節星輅十道監司治稱最優甚惠風纔到豚魚亦
信清霜未降狐兔先愁鎮靜洪都澄清白下又過東
南第一州雲煙底看千岳競秀萬壑爭流離筵無

天上

大

計相留謾慷慨中年白髮稠記瓊花照眼忙催詩筆
松燈促座笑遞觥籌放浪形骸欣於所遇負我蘭亭
共一遊心期在想山陰興盡和月回舟
十二月十四日爲平章呂公壽

蓋世名豪壯歲鷹揚擁兵上流把金湯固守精誠貫
日衣冠不改性氣橫秋北闕絲綸南朝家世好在雲
閒建節樓平章事便急流勇退黃閣難留菟裘喜
遂歸休著宮錦何妨萬里遊似謝安笑傲東山別墅
鷗夷放浪西子扁舟醉眼乾坤歌鬢風霧笑折梅花
插滿頭千秋歲望壽星光彩長照南州

呂道山左丞觀回過金陵別業至元丙子子
識道山於九江今年矣

流水高山獨許鍾期最知伯牙愧我投木李得酬瓊
玖人驚玉樹肯倚蒹葭風雨十年江湖千里望美人
兮天一涯重攜手似仲宣去國江令還家 門前柳
拂隄沙便好繫天津泛斗槎看金鞍鬧簇花邊置酒
玉盃旋洗竹裏供茶朱雀橋荒烏衣巷古莫笑斜陽
野草花寒食近算人生行樂少佳爲佳

夜枕無夢感子陵太白事明日賦此

千載尋盟李白扁舟嚴陵釣車口故人偃蹇足加帝

天上

元

腹將軍權幸手脫公鞞星斗名高江湖跡在爛熳雲
山幾處遮山光裏有紅鱗旋斫白酒須賒 龍蛇起
陸曾嗟且放我狂歌醉飲些甚人生貧賤剛求富貴
天教富貴卻逞驕奢乘興而來造門卽返何必親逢
安道耶兒童笑道先生醉矣風帽敲斜

風入松

詠紅梅將橙子皮作酒杯

使君高宴出紅梅腰鼓揭春雷更將紅酒澆濃豔風
流夢不負花魁千里江山吳楚一時人物鄒枚 輓
金杯襯硬金杯香挽洞庭回西溪不減東山興歡搖

動北海尊壘老我天涯倦客一杯醉玉先頽

天籟集卷上

天上

三



天籟集卷下

元真定白朴太素

風流子

丁亥秋復得仲常書有楚星燕月千里相望
何時會合以副舊遊之語就譜此曲以寄之
花月少年場嬉遊伴底事不能忘楊柳送歌暗分春
色天桃凝笑爛賞天香綺筵上酒杯金激濫詩卷墨
淋浪閒裊玉鞭管絃珂里醉攜紅裏燈火夜行 回
首事堪傷溫柔處竟流落江鄉惆悵鬢絲禪榻肩黛
吟窗甚社燕秋鴻十年無定楚星燕月千里相望何

天下

三

日故園行樂重會風光

燭影搖紅

前事用呂東窗韻

三尺枯桐古來長恨知音少玉簫吹斷鳳樓雲此恨
何時了落日飛鴻聲悄口長江離魂浩渺環能解結
合運同心口口誰表風雨紅稀夢回別院鶯啼曉
一生孤負看花心惆悵人空老待訪還丹瑞草駕颿
輪蓬萊去好又愁滄海恍惚塵揚難尋仙島

摸魚子

七夕用嚴柔濟韻

問雙星有情幾許消磨不盡今古年年此夕風流會
香暖月窗雲戶聽笑語知幾處彩樓瓜果祈牛女蛛
絲暗度似拋擲金梭縈回錦字織就舊時句 愁雲
暮漠漠蒼煙挂樹人閒心更誰訴擘釵分鈿蓬山遠
一樣絳河銀浦烏鵲渡離別苦啼妝灑盡新秋雨雲
屏且駐算猶勝嫦娥倉皇奔月只有去時路

眞定城南異塵堂同諸公晚眺

敞青紅水邊窗外登臨元有佳趣薰風蕩漾昆明錦
一片藕花無數纔欲語香暗度紅塵不到蒼煙渚多
情鷗鷺儘翠蓋搖殘紅衣落盡相與伴風雨 橫塘
路好在吳兒越女扁舟幾度來去采菱歌斷三湘遠
寂寞岸花汀樹天已暮更留看飄然月下淩波步風
流自許待載酒重來淋漓醉墨爲寫洛神賦

天下

五

秋仲一日李具瞻侍御偕予過天慶觀訪蒲
敬之都事旣而登冶城藉草於蒼蒼萬玉中
觴詠樂甚道官王默墮者在焉且盟其兩柏
森立閒構亭爲遊目騁懷之所翌日賦此記
一時之概耳

望參差冶城煙樹故人知在琳宇繡衣來就論文飲
隨意割雞炊黍歡樂處忘爾汝清談況有神仙侶一

杯緩舉放遠目增明遙岑出翠俯仰幾今古 紅塵
夢不到丹臺紫府尋眞偶得佳趣兩株翠柏參天起
千畝渭川煙雨君已許向此地結亭爲我開窗戶朝
來暮去待細攬煙霞平分風月揮灑錦囊句

用前韻送敬之蒲君卜居淮上敬之自翰苑

○靳黃道宣慰幕官

聽西風細吟亭樹秋聲先到衡宇季鷹千里蓴鱸興
更喜范張雞黍傾蓋處慚愧汝高樓不減煙霞侶匏
尊笑舉對得意江山忘懷風月醉眼玩今古 鸞坡
客又向紅蓮幕府田園何日成趣九重聞道思賢佐
恐要濟時霖雨天若許從所好結廬相就開蓬戶山
人休去怕蕙帳空懸猿驚鶴怨貽笑草堂句

復用前韻

問誰歌六朝瓊樹當年春滿庭宇歌殘夜月西風起
吹動一川禾黍愁絕處□□汝姑蘇麋鹿成羣侶清
尊漫舉對澹澹長空蕭蕭喬木慷慨弔今古 生平
苦走徧南州北府年來頗得幽趣綠蓑青笠渾無事
醉臥一天風雨秋幾許沙渚上漁樵小隱隨編戶扁
舟脫去望綺散餘霞江澄淨練還愛謝公句

木蘭花慢

燈夕到維揚

壯東南形勝淮吐浪海吞潮記此日江都錦帆巡幸
汴水迢遙迷樓故應不見口瓊花底事也香銷興廢
幾更王霸是非總付漁樵誰能十萬更纏腰鶴馭
儘飄飄正繡陌珠簾紅燈鬧影三五良宵春風竹西
亭上拌淋漓一醉解金貂二十四橋明月玉人何處
吹簫

題闕

聽鳴騶入谷怕驚動北山猿且放浪形骸支持歲月
點檢田園先生結廬人境竟不知門外市塵喧醉後
清風到枕醒來明月當軒伏波勳業照青編薏苡
又何冤笑鼂爾倭奴抗衡上國挑禍中原分明一盤
碁勢漫教人著眼看師言爲問鷓鴣瀚海何如雞犬
桃源

覃懷北賞梅同參政西庵楊丈和奧敦周卿

府判韻

記羅浮仙子儼微步過山邨正日暮天寒明妝澹抹
來伴清尊行雲黯然飛去悵參橫月落夢無痕翠羽
嘈嘈樹杪玉鈿隱隱牆根山陽一氣變冬温眞實
不須論漫竹外幽香水邊疏影直徹蘇門彷彿對花

終日拌淋漓襟裊醉昏昏折得一枝在手天涯幾度消魂

復用前韻代友人宋子治賦

望丹東沁北澹流水繞孤邨對幾樹疏梅十分素豔
一曲芳尊誰堪歲寒爲友伴仙姿孤瘦雪霜痕翠竹
森森抱節蒼松落落盤根 銅瓶水滿玉肌溫此意
與誰論漸月冷芸窗燈殘紙帳夜悄衡門傷心杜陵
老眼細看來只似霧中昏賴有清風破鼻暗香浮動
吟魂

王彥立所居南齋梅真隱庭中新作盤池同

天下

五

諸公賦

渺高情公子得真隱信悠哉占上下壺天中間隙地
鑿破莓苔移將鑑湖寒影放微風灑灑翠匳開便有
一番荷芰都無半點塵埃 夜深明月晃閒階不負
小亭臺儘羅裊盛香碧筒吸露一洗胸懷紅蓮故家
幕府看新詩題詠滿南齋好聽瀟瀟風雨老夫從此
須來

丙子冬寄隆興呂道山左丞

憶元龍湖海尊俎地笑談閒儘畫燭寒燒紅螺細卷
沈醉更闌西風數聲笳鼓悵匡廬山下送征鞍秋水

蘋花漸老曉霜楓葉初丹 滕王高閣倚江干極目
楚天閒想畫棟珠簾朝雲南浦暮雨西山天涯倦游
司馬更幾時攜手一憑闌別後相思何處月明千里
鄉關

戊子秋送合道監司赴任秦中兼簡程介甫
按察

倦區區游宦便回棹謝山陰算誰似君侯尊鱸有味
富貴無心恩恩又移玉節恨相思何處更相尋渭北
春天樹遠江東日暮雲深 岸花檣燕動悲吟把酒
惜分襟問玉井蓮開三峰絕頂誰共登臨長安故人
好在憶元龍名重古猶今說與英雄湖海應憐枯槁
山林

天下

美

己丑送胡紹開王仲謀兩按察赴浙右閩中

任

時浙憲置司於平
江故有向吳亭句

擁煌煌雙節九萬里入鵬程愛人物鄒枚文章李杜
海內聲名相逢廣陵陌上恨一尊不盡故人情歲月
奔馳飛鳥交游聚散浮萍 出門一笑大江橫馬首
向吳亭且分路揚鑣七閩兩浙得意澄清江山贍供
詩否想徘徊南斗避文星留著調元老手卻來同佐
昇平

歌者樊娃索賦

愛人閒尤物信花月與精神聽歌串驪珠聲勻象板
咽水縈雲風流舊家樊素記櫻桃名動洛陽春千古
東山高興一時北海清尊天公不禁自由身放我
醉紅裙想故國邯鄲叢臺老樹儘賦招魂青山幾年
無恙但淚痕差比向來新莫要琵琶寫恨與君同是
行人

爲樂府宋生賦宋子壽香燕城好事者爲渠
寫真手撚茶蘼二枝

天下

毛

展春風圖畫恍人世有神仙愛手撚茶蘼香閒韻遠
彈痕垂肩東鄰幾番親見意丹青無地著嬋娟杏臉
紅生曉暈柳眉翠點春妍舞衫歌扇綺羅筵還我
舊因緣儘金縷新聲烏絲醉墨共惜流年年來茂陵
多病更玉琴淒斷鳳鸞弦時方留得一枝春在不妨
絕倒尊前

題闕

快人生行樂卷江海入瑤觴對滿眼韶華東城南陌
日日尋芳吟鞭緩隨驕馬帶春風指點杏花牆時聽
鶯啼婉轉幾回蝶夢悠揚行雲早晚上下巫陽驀地
惱愁腸待玉鏡臺邊銀燈影裏細看濃妝風情自憐

韓壽恨無緣得佩賈充香說與殷勤青鳥暫時相見
何妨

感香囊悼雙文

覽香囊無語漫流淚溼紅紗記戀戀成歡恩恩解佩
不忍忘他消殘半襟蘭麝向繡茸詩句映梅花疏影
橫斜何處暗香浮動誰家春霜底事埽濃華埋玉
向泥沙歎物是人非虛迎桃葉誰偶匏瓜西風楚詞
歌罷料芳魂飛作碧天霞鏡裏舞鸞空在人間後會
無涯

玉漏遲

天下

天

題闕

故園風物好芳尊日日花前傾倒南浦傷心望斷綠
波春草多少相思淚點算只有青衫知道殘夢覺無
人解我厭厭懷抱懊惱楚峽行雲便賦盡高唐後
期誰報玉杵玄霜著意且須重擣轉眼梅花過也又
屈指春殘燈鬧妝鏡曉應念畫眉人老

予亦有感

瑞香花正吐誰交付與東君爲主夢覺廬山一片綠
雲何所惆悵留題在壁麝墨染無窮愁緒常記取徘徊

徊顧影燈前低語 幾許款密留情繫絆煞口口世
閒兒女淪落天涯夜夜月明湓浦連我青衫淚滿料
不忍孤帆東去離思苦休唱渭城朝雨

題闕

碧梧深院悄清明過也秋千開了楊柳陰中又是一
番啼鳥人去瑤臺路遠孤負卻花前歡笑音信杳西
樓盡日憑闌凝眺 縹緲霧閣雲窗恨夢斷青鸞夜
深寒悄簷玉敲殘推得五更風小麝炷金猊燼冷畫
燭短銀屏空照芳徑曉惆悵落紅多少

江梅引

天下

无

題闕

一溪流水隔天台小桃栽爲誰開應念劉郎早晚得
重來翠幄天寒憔悴損倚修竹口殘紅墮綠苔 怨
極恨極愁更哀甚連環無計解伯勞分背燕飛去雲
樹蒼崖口口千里何處託幽懷温嶠風流還自許後
期杳口塵生玉鏡臺

秋色橫空

本名玉耳墜金環蓋遺山用前人詞首句爲名

賦虞美人草

兒女情多甚千秋萬古不易消磨拔山力盡垓下困

英雄尚擁兵戈含紅淚翠蛾拌血污游魂逐太阿
草也風流猶弄舞態婆娑 當時夜聞楚歌歎烏騅
不逝恨滿山河恩恩玉帳人東去耿耿素志無他黃
陵廟湘水波記染竹成斑泣舜娥又豈止虞兮無可
奈何

順天張侯毛氏以早梅命題索賦時壬子冬
搖落初冬愛南枝迴絕暖氣潛通含章睡起宮粉褪
新妝澹澹丰容冰蕤瘦蠟蒂融便自有翛然林下風
肯羨蜂喧蝶鬧豔紫妖紅 何處對花興濃向藏春

池館透月簾櫳一枝鄭重天涯信腸斷驛使相逢關

天下

三

山路幾萬重記昨夜筠筒和淚封料馬首幽香先到
夢中

石州慢

丙寅九日期楊翔卿不至書懷用少陵詩語

千古神州一旦陸沈高岸深谷夢中雞犬新豐眼底
姑蘇麋鹿少陵野老杖藜潛步江頭幾回飲恨吞聲
哭歲暮意何如怯秋風茅屋 幽獨療飢賴有楚萍
煖老尚須燕玉白璧微瑕誰把閑情拘束草深門巷
故人車馬蕭條等閒瓢棄尊無綠風雨近重陽滿東
籬黃菊

鳳凰臺上憶吹簫

題闕

笳鼓秋風旌旗落日使君威震雄邊羨指麾貔虎斗
印腰懸盡道多多益辦仗玉節亳邑新遷江淮地三
軍耀武萬竈屯田戎軒幾回□□畫戟門庭珠
履賓筵慣雅歌堂上起舞尊前況是稱觴令節望醉
鄉有酒如川明年看平吳事了圖像凌煙

滿庭芳

屢欲作茶詞未暇也近選宋名公樂府黃賀

陳三集中凡載滿庭芳四首大概相類各有

天下

三

得失復雜用寒刪先韻而語意若不倫僕不
揆狂斐合三家奇句試爲一首必有能辨之
者

雅讌飛觴清談揮塵主人終夜留歡密雲雙鳳碾破
纓金團□品香泉味好須臾看蟹眼湯翻銀瓶注花
浮兔椀雪點鷓鴣斑雙鬢微步穩春纖擎露翠奩
生寒覺清風扶我醉玉頰山照眼紅紗畫燭吟鞭送
月滿吟鞍歸來晚芸窗未寢相伴卸妝殘

綠頭鴨 一名多麗

洞庭懷古

黯消凝楚天風物淒清過黃陵山長水遠古今遷客
傷情渺澄波聚魚曲港浣紗人去掩柴荆洞庭晚菽
花風細秋月照茅亭一壺酒澆平磊魄問甚功名
買扁舟安排歸去五湖煙景誰爭等閒攜弄瓢西子
恍惚遇鼓瑟湘靈看盡嬌顰聽殘雅奏暮雲江上數
峰青松樓底香芹鮮鯽還似越中行閑身好浮家泛
宅聊寄平生

永遇樂

至元辛卯春二月三日同李景安提舉游杭

州西湖

天下

三

二月西湖四時煙景誰暇游徧紅奩津樓青旗柳市
幾處簾爭捲六橋相望蘭橈不斷十里水晶宮殿夕
陽下笙歌人散唱徹采菱新怨金明老眼華胥春
夢腸斷故都池苑和靖祠前蘇公隄上漫把梅花撚
青衫儘耐濛濛雨溼更著小蠻鍼綫覺平生扁舟歸
興此中不淺

賀新郎

題闕

喜氣軒肩字口盧郎風流年少玉堂平步車騎雍容
光華遠不似黃梁逆旅抖擻盡貂裘塵土便就莫愁

雙槳去待經過蘇小錢塘渡畫圖裏看煙雨一尊
邂逅歌金縷望晴川鑪峰瀑布浪花溢浦老我三年
江湖客幾度登臨弔古悵日暮家山何處別後船頭
虹貫日想君還東觀圖書府天咫尺聽新語

燕瑤池

本名八聲甘州樂府八聲甘州名頗俚鄙子
愛其法雅健因采東坡戚氏一篇稍加釐括
使就新翻仍改其名

玉龜山阿母統羣仙幽閑志蕭然有金城千里瓊樓
十二紫翠霏煙穆滿當時西狩八駿戲芝田駐蹕瑤
池上命賜華筵天樂雲璈鼎沸看飛瓊舞態醉飲
留連漸月斜河漢霞綺布晴天望神州東回玉輦杏
花風數里響鳴鞭長安近依稀柳色翠點秦川

垂楊

壬子冬薄游順天張侯毛氏之兄正卿邀予
往拜夫人既而留飲撰詞一詠梅以玉耳墜
金環歌之一送春以垂楊歌之詞成惠以羅
綺四端夫人大名路人能道古今雅好客自
言幼時有老尼年幾八十嘗教以舊曲垂楊
音調至今了然事與東坡補洞仙歌詞相類

中統建元壽春權場中得南方詞編有垂楊
三首其一乃向所傳者然後知夫人真承平
家世之舊也

關山杜宇甚年年喚得韶華歸去怕上高城望遠煙
水迷南浦賣花聲動天街曉總吹入東風庭戶正紗
窗濃睡覺來驚翠蛾愁聚一夜狂風橫雨恨西園
媚景怱怱難駐試把芳菲點檢鶯燕渾無語玉纖空
折梨花撚對寒食厭厭心緒問東君落花誰是主

西江月

題闕

天下

五

白石空銷戰骨清泉不洗飛埃五雲多處望蓬萊鞭
石誰能過海一夕神游八表眾星光拱三台天公
元不棄非才坐我金銀世界

郭祐之得雄渠卽賈治中塔

天上靈樁未老月中丹桂初花充閭佳慶儘堪誇聖
善元來姓賈廣座平分玉果絳顱賸拂丹砂從今
人說細侯家自有青衫竹馬

題闕

過隙光陰流轉還丹歲月緜延幾人青髻對長年且
鬪時閒康健四海幸歸英主三山免化飛仙大家

有分占桑田近日蓬萊水淺

九江送劉牧之同知之杭

我自紉蘭爲佩君方剖竹分符才情風調有誰如彷彿三生小杜置酒昔登峴首題詩今對匡廬青衫恨不到西湖共溼黃梅細雨

李元讓赴廣東帥幕

皎皎風前玉樹煌煌腰下金符陳琳檄草右軍書香滿紅蓮幕府政自雄心撫劍不妨雅唱投壺長纓繫越在須臾看埽蠻煙瘴雨

漁父

天下

姜

世故重重厄網生涯小小漁船白鷗波底五湖天別是秋光一片竹葉醅浮綠醖桃花浪瀆紅鮮醉鄉日月武陵邊管甚陵遷谷變

浪淘沙

題闕

今古海山情月牖雲肩潛教小玉報雙成整頓羅衣斜斂出門外嬌迎燈暗酒微醒鬢亂釵橫一春心事語丁寧明夜間衾容易冷誰復卿卿

題闕

青鑲幾窺容帶結心同臨鸞誰與畫眉峰自恨尋芳

來較晚孤負春紅 無物比清濃無計相從殷勤心
事若爲通留得青衫前日淚彈滿西風

題闕

行路古來難似得還山山閒終是勝人閒風月琴尊
應不羨塵土征鞍 何處老來閑白下長干一番春
事又闌珊 缺二句

朝中措

題闕

燕忙鶯亂鬪尋芳誰得一枝香自是玉心皎潔不隨
花柳飄揚 明朝去也燕南趙北水遠山長都把而

天下

美

今歡愛留教後日思量

題闕

娃兒十五得人憐金雀髻垂肩已愛盈盈翠裏更堪
小小花鈿 江山在眼賓朋滿座有酒如川未便笑
蓉帳底且教玳瑁筵前

題闕

田家秋熟辦千倉造物很難量可惜一川禾黍不禁
滿地螟蝗 委填溝壑流離道路老幼堪傷安得長
安毒手變教四海金穰

題闕

蒼松隱映竹交加
千樹玉梨花好箇
歲寒三友更堪
紅白山茶 一時折得銅瓶插
看相映烏紗明日扁
舟東去夢魂江上人家

題闕

東華門外輭紅塵
不到水邊村任是和羹傳鼎爭如
漉酒陶巾 三年浪走有心
遯世無地棲身何日團
圓兒女小窗燈火相親

清平樂

詠木犀花

碧雲葉底萬點黃金蕊
更看薔薇清露洗
澤國秋光

天下

毛

如水 餘生牢落江南幽
香鼻觀曾參見說小山招
隱夢魂夜夜雲嵐

詠水仙花

玉肌消瘦徹骨薰香透
不是銀臺金盞酒愁殺天寒
翠裊 遺珠悵望江皋飲
漿夢到藍橋露下風清月
慘相思魂斷誰招

李仁山檻中蟠梅

前村瀟灑雪徑人回駕
一檻誰移春造化
鬱鬱香浮
月下 青綾半護冰姿
宛然臨水開時說與綠毛
么 鳳不妨倒挂虬枝

李仁山次韻自注蟠梅來自杭和靖詩句得
于孤山也

瑤英輕灑姑射飄仙駕巧奪孤山能變化夭矯飛
來白下絕憐玉骨清姿不隨紅紫芳時要識天
然標格竹籬茅舍橫枝

題闕

笙篴朱字夢覺參差是不種仙家白玉子著甚消
好事桃花門外重重一言半語相通縈損題詩崔
護幾回南陌春風

題闕

天下

美

朱顏漸老白髮添多少桃李春風渾過了留得桑榆
殘照江南地迴無塵老天一片閒雲戀殺青山不
去青山未必留人

同施景悅賭雙陸不勝戲作

閑尋博奕飽飯消長日自笑家儲無甌石百萬都教
一擲平生酒聖詩豪韋娘局上相嘲今日風流磨
折翠裘輸與絕袍

點絳脣

題闕

翠水瑤池舊游曾記飛瓊伴玉笙吹斷總作空花觀

夢裏關山淚浥羅襟滿離魂亂一燈幽幔展轉秋宵半

小桃紅

歌姬趙氏嘗爲友人賈子正所親攜之江上
有數月留後子過鄧往來侑觴感而賦此俾
卽席歌之

雲鬟風鬢淺梳妝取次尊前唱比著當時口江上減
容光 故人別後應無恙傷心留得輓金羅裏猶帶
賈充香

蹋莎行

天下

詠雪

完

凍結南雲寒風朔吹紛紛六出飛花墜海仙翦水看
施工仙人種玉來呈瑞 梅萼清香竹梢點地畫闌
倚溼湖山翠先生方喜就烹茶銷金帳裏何人醉

浣溪沙

酒閒贈金禪師時近六旬頭白如雪

世事方艱便猛回叢筠佳處得栽培花光別有一枝
梅 頭似雪盃那復漆心如風篆也無灰生前相遇
且銜杯

附錄

蘭谷先生像贊

堯舜在上巢許在下箕穎清風千載可亞如谷之虛
如蘭之馨不爲利往不求幸生降志辱身依隱玩世
孰識其全以卒於義果由竹間數少涼贈真高齋坐

曹氏又賦蘭名也春芳芬且天籟曹同安育齋

猗嗟先生挺生前代肥遯林泉才華超邁富有文辭
名曰天籟深谷之蘭芬芳猶在遺像儼然載瞻載拜

水調歌頭

擬白蘭谷

李道純

三元祕秋水微密實難量未分清濁天地人物一包

天下

早

藏一乃太玄眞水二氣由茲運化三極理全彰上下
降升妙根本在中黃 兔懷胎牛喘月蚌含光人明

此理倒提斗柄犀銀潢絕斷曹溪一派掀倒蓬萊三
島無處不仙鄉誰爲白蘭谷安寢感羲皇

醉江月

陳富霖

滑稽玩世知包藏多少春花秋月天籟有詞人有像
還似遺山風節松下巢由竹閒逸少氣韻眞高潔坐
閒撫掌溪山等是詩訣見說多景樓前鳳凰臺上
醉帽風吹裂千古英豪消歇盡江水至今悲咽萬里
投荒三年坐困一樣家愁絕寄聲知否一杯當醉江

雪

天籟集卷下

天下

罕



白仁父天籟詞六安楊希洛刻於康熙庚寅朱
竹垞定爲二卷并爲之序前載元王博文序明
孫作序字畫精妙藏書家亦罕見光緒壬辰吾
友王君佑遐重刻於四印軒而小象撫遺均刪
去今仲館侍郎借錢塘丁氏舊鈔本錄副并屬
荃孫與楊本合校付梓而丁本頗異楊本朱序
云希洛得之仁父裔孫析爲二卷似已前無刻
本而丁本亦分二卷長號聯屬王序在前孫序
在後標明後序一也摸魚子五首楊本在上卷鈔本
在下卷二也有楊本脫鈔本有者如奪錦標得

天跋

一

友人李友蔚書水龍吟兼簡盧師道水調歌頭
十月海棠均存小注奪錦標之慘哀音令人嗟
惜慘字未脫滿江紅同鄭都事復用前韻同字
未脫沁園春世事就裏就裏二字未脫燭影搖
紅環能解結合運同心口誰表十字未脫疑有誤字
三也有楊本誤而鈔本不誤者水龍吟曹光輔
和作從今都付黃梁楊作黃糧念奴嬌月娥楊
作嫦娥滿庭芳序用寒刪先韻用下不增無字
四也有兩本不同而兩通者如秋色橫空楊本
題詠梅順天張侯毛氏以文母命題索賦鈔本

題順天張侯毛氏以早梅命題索賦時壬子冬
石州慢療飢賴有楚萍不作商芝五也今刊楊
本而以鈔本改正之字均綴於此慎弗再以楊
本正之至四印本則重翻楊本又不完全更無
論矣光緒乙巳江陰繆荃孫跋

10325

天跋

二

